

Forfatter: Skjoldborg, Johan

Titel: Hjemm fræ

Citation: Skjoldborg, Johan: "Hjemm fræ", i Skjoldborg, Johan: *Dynæs Digte*, Gyldendalske Boghandel, Nordisk Forlag, 1915, s. 63. Onlineudgave fra Arkiv for Dansk Litteratur: https://tekster.kb.dk/catalog/adl-texts-skjold_03-shoot-workid57490/facsimile.pdf (tilgået 25. september 2021)

Anvendt udgave: Dynæs Digte

HJEMM FRÆ

(HANNÆSBOMAAL — VED SPROGSKELLET)

A howe godt mi bette Ti
we Faaes aa Mues Haaend,
wor Huws i Læ we Præjstens Haww
aa tæet we Fywestraaend.

En Straaend, dæ gjik fræ Gorbækshag'
aa uwd i Hollemtaang;
den Straaend i Bowt aa Wigh a wild'
mæ ajer nødde praanng.

Stienpekkern ga sæ waandt for Ægg
mell Skrabskjæl aa broged' Stien,
aa Rylen klawed sæ aa rend
po hinne Raangel-Bien.

Men Fywren den wa no de bæjst;
sin a wust op til Mand,
a oller haar en Fywer sit
som uwd for Øsløs-Land.

Den skjywtter gal aa gae, som Folk
di skjywtter Sindlaw te;
a tøgges oller, a haar sit
nøj Wond saa wild som de!

Aa manne skjønn Ting haar a sit,
som Suelen skjennt epo,
men oller haar a sit nøj Wond
som de saa blaank aa blo.

Di skjønnest Lannd', te a weed o,
ku sies fræ wo Straaend,
Lyw aa Fuwr aa Hemmerland
aa Mohs po hywer Haaend.

Aa oll di Skjib, dæ sejlt fobi,
aa Feskehöhd i Raaend
naar de tow uwd fræ Øsløs-Land
en Sommer-Awtenstaaend.

Dæ gijk i Fywesih' wi Knæjt'
aa waajed laandt aa læng,
Jens Skrædders Jenns aa Søren Nihls
aa oll di ajer Drænnng.

65

Wi waajed møj, wi fesked Ræ,
o Kræbs dem fæk wi nøij,
den Ti Mads Towdal gijk mæ Glijb
aa Pier han browt æ Krøij.

We Fywren uwnt wi, aa wi sow
we Sjøngen aa we Suws.
A howe godt mi bette Ti,
mi Faaes aa Mues Huws.

*